

欽定剿平三省邪匪方略

欽定剿平三省邪匪方略續編卷十七

癸亥年

七月十八日

庚戌

吳熊光奏言前由歸州龔家橋

竄往南漳保康一帶之零匪至興山大羅溪老

林與該處零匪魯合約共有八十餘人屯焦壩

山頂該處林深山險路徑叢雜當卽委員王斌

第糾集寨勇於各路要隘堵禦都司麻光裕由

山左覓路上攻隨有戴頂賊目一人帶領散賊

三十餘人由右手埡口衝出當用鎗將該賊目擊斃並殺死散賊一名時兩旁林內又有伏賊四十餘人蜂擁而出適叅將毛秉剛帶兵趕到兩路抄截各匪畏懼分匿老林四散奔逃毛秉剛麻光裕入林搜捕該匪又聚集三十餘人向連三坪狂奔經該處寨勇鎗斃五名餘匪二十餘人卽由兩河口翻鐵廠向區擔溝一帶奔逸

又添派叅將李貴遊擊李東宣都司鄧興相
分投帶兵趕往協剿現據吉林泰李天林稟報
石堽子空桐樹堽有零匪數股每股十餘名暨
數名不等派員帶兵往捕俱有殲擒各寨勇亦
有拏獲並割取耳記呈獻是否卽係毛秉剛剿
散之賊抑係另行匿竄上已飛札嚴查此等零
匪若不剷絕根株必致隨處裹脅復貽後患所

關甚重

臣

仍嚴飭麻光裕等緊躡追剿檄飭叅

將李貴等分路窮搜並令各鎮將與寨員等一

體留心偵捕總期肅清之中務求完善斷不任

其遷延鬆勁

吳熊光又奏言接准經畧額勒登保來信內稱

奏明撤回外省官兵各留本省官兵防剿楚省邊

境擬留兵一萬名

臣

現分別留撤至湖北邊境

現在本省官兵止五千餘名合之兩廣湖南官
兵亦不過八千餘名加以麻光裕等所帶鄉勇
始足一萬之數目下賊勢雖已窮蹙但餘氛一
日未淨仍當實力搜剿若如刻勒登保等所定
尙須於各營汛抽調四千餘名不特新調之兵
未慣走山恐不得力且此時向安襄郟一帶紛
紛撤調亦慮民情疑駭臣再四籌思惟有一面

先儘現在兵力上緊排搜肅清楚境一面於各
營汛密爲分派再察看賊情將各省官兵陸續
抽調俟調出若干先將兩廣官兵次將湖南官
兵照調出之數多分起數以次撤回如此辦理
庶本省不至張皇而外省官兵亦免久戍再查
東三省馬隊於平地馳驟更足以展其所長又
吉林官兵鎗手居多而黑龍江則全係弓箭教

匪懼之尤甚是以臣此次挑黑龍江奮勇官兵
一百十三員名暫留彊壓俟應撤之時再行

奏明辦理其餘官兵分作三起頭起官兵一百零
六員名交副都統銜總管都當阿管帶第二起
官兵九十一員名交協領武成額管帶第三起
官兵七十二員名交副都統銜總管托爾托保
管帶間日起程妥爲應付奏入

上命軍機大臣傳諭吳熊光曰此時楚境餘匪零星竄匿統計總不過八十餘人但其情狀尙覺兇狡吳熊光當飭鎮將等上緊搜盡剷絕根株該省帶兵大員尙不乏人著責成慶成慶溥吉林泰李天林等諸路會集將此八十餘匪奮力追捕尅期完竣毋得稍有稽緩其另片所奏挑留黑龍江奮勇官兵一百十三員在楚省平地居多東三省馬兵

馳駁較爲得力而黑龍江官兵弓箭標稱賊匪更
形畏懼應卽將此項官兵交與慶溥等帶領排搜
自屬有益不僅足資彈壓之用卽撤回稍遲亦無
不可至另摺奏稱將本省官兵密爲分派陸續抽
調先將兩廣湖南官兵照數撤回等語所辦非是
外省客兵自赴調從征以來已閱數年今搜捕垂
竣奏報肅清若復於各營汛續調官兵未免民情

疑駭且新調兵丁於各處山林徑路向未熟悉難
期得力况一撤一調沿途應付供支及借給行裝
安家等項徒多需費亦屬虛糜莫若將兩廣湖南
官兵先行撤遣回營至湖南官兵係該督所轄卽
餘氛淨掃以後或有需資彈壓之處亦不妨再行
酌留陸續撤歸儘可毋庸亟亟也

二十六日

戊午

祖之望奏言竊照太白山另有逼

出零匪臣遵奉

諭旨飛咨楊芳趕緊搜洗去後現據具報此起零匪因各路官兵分投兜截南竄至城固屬之中溪溝老林可由五道梁竄出棧道楊芳督同都司黨連陞等連夜帶兵抄出賊前攔剿賊匪不敢西竄卽折回東路牛尾河一帶官兵沿路追殺共斃賊十一名並擒獲賊探一名當卽正法探

知該匪遁入黃柏園老林又經派員入林搜拏
斃賊四名現仍挑帶奮勇官兵追截以期悉數
殄滅等情

臣

查此起零匪原只八九十人經楊

芳剿殺所存不過五六十人日內再能痛剿一

次即可悉數翦除再

臣

頃據寧陝江口營叅將

李英多稟報千總王萬年拏獲賊目苟文和一

名

臣

當經飭提審訊據苟文和供係苟文明族

弟向習白蓮教嘉慶元年苟文明合羅其清謀
逆該犯卽投入賊營充當頭目到處焚殺七年
正月間同苟文明竄過漢江於寧陝沙窩子地
方與副將韓自昌打仗該犯親手將韓自昌戕
害等情查該犯與首逆羅其清苟文明同時起
事到處肆擾並戕害副將大員實屬罪大惡極
當卽恭請

王命凌遲處死並當場安設副將韓自昌靈位剖心
致祭以彰

國憲而慰忠魂奏入

上命軍機大臣傳諭祖之望曰太白山零匪原只八
九十人經楊芳等節次帶兵抄擊沿途斬獲祇不
過十餘名未能痛加剿洗尙剩五六十人在彼奔
竄亟應上緊辦竣前令提督楊遇春帶兵回陝督

同楊芳吳廷剛等協力排搜計口內諒已抵陝該
撫務須咨催楊遇春等迅將山內餘匪翦除淨盡
尙可仰邀恩賚尙再有稽遲或經額勒登保聞信
前來趕剿甚或至德楞泰展覲回川彼時陝境尙
未廓清又須帶兵赴陝幫同剿辦則伊等遲緩之
咎斷難寬宥矣至苟文和一犯旣經習教又會抗
拒官兵戕害副將韓自昌亦係有名賊目今千總

王萬年將該犯拏獲審明正法未令漏網雖非臨陣生擒實屬能事著該撫存記遇有該弁應陞之缺卽行陞用嗣後除拏獲尋常賊犯酌量加賞外如能盤獲有名賊目者卽照此辦理

八月初二日

甲子

額勒登保勒保奏言

臣

等昨於

初八日將三省肅清緣由會同恭摺馳奏後德楞泰卽於次日由四川太平起程進京

臣

等督

催鎮將等仍舊分路搜山並將留兵撤兵各事
宜連日詳細商辦伏查川陝楚三省地勢犬牙
相錯東至巴巫西至寧廣道路綿長共有二千
餘里其間交界之處盡係大山崇岡峻嶺深林
密箐向來寧謐無事時尙屬奸宄潛蹤之藪此
次教匪滋事用兵日久人跡不能盡到之處一
二零匪藏匿偷生誠難保其必無旣不可稍留

遺孽又不可久稽大兵是以臣等前議凱撤馬
步官兵各留本省兵勇分段防搜仰蒙

聖明俞允臣等將現在三省應留征勇各數均勻分

撥川省廣元所屬之朝天關起至通江所屬之

竹峪關爲一段分撥兵勇二千名將備八員交

提督豐紳統領在廣南巴通一帶往來會哨梭

織巡防又自竹峪關起至太平所屬之後坪爲

一段分撥兵勇三千名將備十二員交總兵田朝貴統領在中河後河及太平屬之城口大竹河八台山白森坪旗杆山雞鳴寺等處老山內外往來搜捕又自後坪起至大寧所屬之八石坪爲一段分撥兵勇二千名將備八員交總兵馬瑜統領在一碗泉徐家壩黃坪等處巡防緝又自八石坪起至巫山所屬之黃泡池爲一

段分撥兵勇一千名將備五員交總兵蒲尙佐
統領在大昌觀音巖等處巡防搜緝再雲開東
達梁萬等處雖係腹地州縣此時威氛已淨但
久經兵燹之後百姓每多風鶴之驚不可空虛
無備現撥兵勇三千名派副將桂涵蕭鳳來以
及叅遊都守等官管帶分作六七路巡哨搜緝
又嘉陵江上游與陝甘毗連亦不可遽令空虛

分撥官兵一千名交總兵呂朝龍管帶防守以
上川省各路官兵仍總歸勒保督辦陝境以李
家壩石龍壩荷葉嶺三處爲一段派總兵國興
阿帶兵一千五百名在關口壩駐劄防哨督搜
以廟壩鐵爐壩哨風樓花石梁四處爲一段派
總兵汪啓帶兵二千名在河口壩駐劄防哨以
大池壩細辛壩二處爲一段派總兵九十帶兵

一千名在龍池場駐劄督搜以分水嶺中山廟
油盤埡三處爲一段派副將朱槐叅將安定邦
帶兵勇一千五百名在中壩古家坡駐劄防哨
以九拱坪松樹壩二處爲一段派叅將李朝顯
帶兵勇七百名駐劄督搜以茅壩關麻柳壩鹿
池壩三處爲一段派遊擊慶麟國敏孝順阿分
帶兵勇一千二百名駐劄搜緝以鐵砭溪繞溪

河二處爲一段派副將劉管城帶兵勇一千四百名在西鐵佛寺駐劄督搜以八僊河平溪河二處爲一段派都司柯藩帶兵勇八百名駐劄防哨以中心石螞蝗壩偏東子三處爲一段派總兵喜明帶兵勇一千五百名在大莊溪駐劄搜捕再令將軍與奎帶兵勇一千四百名在元壩子一帶分卡駐劄自西鄉箭桿山以西至寧

廣交界七百餘里分段各鎮將均歸與奎統帶
督飭又提督楊遇春帶兵勇二千名在紫陽溪
水河一帶分卡駐劄自箭桿山以東至安康平
利二竹邊境一千一百餘里分段各鎮將均歸
楊遇春統領督飭所有陝境留防各卡兵勇每
日梭織巡搜均令與川楚二省官兵往來會哨
務令聲勢聯絡使賊匪無地潛逸其楚境卽照

德楞泰奏定章程分作三段交總兵慶溥李天
林吉林泰三人分段防哨總歸提督慶成統領
督飭辦理臣等籌商定局現將卡弁兵勇搭配
妥設謹先將三省交界各州縣營汛以及現擬
分設段落彙繪成圖粘簽貼說恭呈

御覽至連日官兵四路搜山據總兵田朝貴一路在
青草坪銀廠坪大竹河等處老林先後搜獲零

賊十八名又據叅將薛陞一路在大茅坡殲斃
偽元帥張林生擒偽先鋒張正榮並賊夥共四
名總兵達自祥一路在黑包山搜獲零匪二名
副都統銜達斯呼爾岱副將羅聲舉一路在雞
鳴寺四方石一帶老林搜捕零賊五名又據叅
將羅思舉遊擊周士貴等在貝母池老林搜獲
零賊十一名又據叅將馬文斌等在寒水壩搜

獲僞先鋒郭大才並殺斃賊夥四名又據參將
徐弼一路在雲陽所屬白巖山地方搜獲零賊
七名又據都司祁恩榮等在紅花園老林搜捕
僞總兵田太亨及賊夥等共七名又據都司趙
琴在黃白灣老林搜獲賊匪一名又據臬司劉
清派出軍功臧青雲在南江所屬沙溪子搜獲
賊匪三名以上所獲賊匪俱經該鎮將等解送

臣等軍營審明正法照格給賞又據署雲陽縣知縣梁敦懷稟報有零賊黃朝舉等八名赴縣投首又據總理團練之成都府知府趙秉淵稟報有零賊劉文光等三名赴三星寨投首查該匪等均經官兵剿散竄匿山林今悔罪投首自應免其一死業已飭交各原籍地方官取保安插又據萬縣知縣王世燾稟稱該縣石灰壩地

方團勇殺賊一名生擒賊一名開縣知縣馬鳴
鑿稟稱該縣新碭子團勇盤獲零賊二名大寧
縣知縣郭南英稟稱該縣朝陽碭團勇盤獲偽
先鋒李炳貴一名泉山縣知縣符永培稟稱該
縣軍功劉鳳池等在佛印山張家壩一帶搜山
拿獲賊匪一名經該縣等訊明均係官兵剿散
之賊當卽批飭正法軍功團勇等照格給賞且

下該匪僅三五爲羣零星四散餘氛實屬無幾
現仍飭催各路鎮將常川梭織巡哨搜緝不致
稍有漏網至於此時應撤官兵額勒登保軍營
原留馬隊官兵三百餘員各分派各路隨征防
剿茲德楞泰帶來馬隊官兵一百餘員名額勒
登保一併歸集點驗擇其年力強壯者遵

旨挑出侍衛章京等十員吉林官兵五十員名黑龍

江官兵四十七員名留於軍營隨同額勒登保
作爲聲勢以資差遣俟額勒登保回京時順便
全行帶回其餘均先行凱撤至南山逼出零匪
數十人經楊芳督率搜洗已續有斬獲所剩無
幾諒不日即可辦竣楊遇春昨已回至陝界歸
集營卡防兵其原帶剿兵在川境山內臣額勒
登保已飛行照會楊遇春一面挑集勁兵預備

一面專差能事誠實之弁前往南山確探情形
如果尚須兵力臣額勒登保回陝當會楊遇春
卽帶兵由西鄉星馳入山督飭緝搜以冀及旦

肅清

同日吳熊光奏言臣接據叅將毛秉剛稟報帶

兵回駐南路於途次順道搜巡軍功梁奇在房
縣牌口地方擒獲賊匪李文魁一名供認曾在

黃號樊人傑股內充當探馬頭戮死惠倫又據
總兵吉林泰稟報派出將弁在於巴東一帶老
林搜獲賊匪五名內有楊富一名向在賊營充
當偽先鋒據總兵李天林稟報都司姜文聘唐
盛高搜至尖梨園探有賊匪十餘名當卽鎗斃
二名投崖跌斃者數名餘匪數名棄矛四散現
在追捕其餘各營卡及各州縣寨勇均有擒獲

賊匪一二名不等自卽係前次叅將毛秉剛都
司麻光裕沿途追散之賊爲數亦止二十餘人
該匪現竄房縣與巴三屬交界之溫水河高樹

河一帶藏匿

臣

前次添派之叅將李貴遊擊李

東宣俱已到齊現與都司麻光裕撩棄鍋帳裹
帶乾糧深入老林三路圍捕冀可得手均奏入

上命軍機大臣傳諭額勒登保勒保曰此次各處山

內零匪經額勒登保派出將領分投斬捕又幾及
百人現在川境餘匪不及百人本日據吳熊光奏
到楚省零匪祇剩二十餘人其陝省南山零匪亦
不過五六十人是統計三省賊數不滿二百人更
無難尅期殲盡不留餘孽從前川省囑匪動輒數
百爲羣較之此時剿剩零匪尙多今餘氛業將淨
盡仍應力爲掃蕩卽當日囑匪餘孽亦可趁此辦

淨額勒登保等當嚴飭各路上緊搜捕務絕根株
至三省地勢犬牙相錯深山窮谷誠恐有散匪零
星藏匿額勒登保等將三省應留征兵征勇均勻
散撥責成各將領分投梭巡會哨並繪圖貼說進
呈自應如此辦理該處地方情形伊等經歷數年
最爲熟悉果能逐段嚴搜自不虞再有餘匪潛匿
伊等所進圖說存留備覽其所留兵勇則全在伊

等隨時酌量情形以次裁撤德楞泰奏現在將次到京伊展觀回川額勒登保接替入京時或將所留兵勇酌爲減撤一半其餘存留兵勇川省責成德楞泰勒保楚省責成吳熊光慶成陝甘責成興奎楊遇春總須察看各該省境內實在無零匪潛留地方可以放心將兵勇全行裁撤否則寧以稍遲時日爲要至摺內稱差弁確探南山情形如須

兵力俟額勒登保回陝當令楊遇春卽帶兵由西
鄉星馳入山等語現在太白山零星敗殘之賊尙
有五六十人楊芳等在彼搜捕誠恐兵力不敷節
經諭令楊遇春趕緊赴彼幫同辦理額勒登保早
應遵旨令其前往試思額勒登保回陝須候德楞
泰由京赴川伊來山莊展覲不過從陝省經過若
至彼時方飭該提督前赴南山搜緝豈不太覺遲

緩著接奉此旨卽令楊遇春帶兵迭往會剿毋再
耽延又據稱所獲賊匪經該鎮將等解送軍營審
明正法所辦甚是其各州縣拏獲零賊經地方官
訊明均係官兵剿散之賊當卽批飭正法此亦可
行從前賊匪蔓延時各路官兵將所獲之賊隨時
懲辦自不及紛紛盡解大營審訊今大功已蕪逐
日搜捕亦祇係一二零星散竄之賊若竟任聽各

路自行辦理恐不免有仇殺邀功情弊嗣後凡遇
相近大營地方卡隘捕拏情罪較重之犯自須解
赴大營審辦其離營較遠者亦必訊明實係真賊
稟明經畧總督親加批飭方許隨時正法至戕害
穆克登布之賊惟余佐斌一人日久尙在稽誅該
犯係著名賊目屢次摺內未經提及應卽轉飭各
路探明下落嚴密查拏毋任漏網

上又命軍機大臣傳諭吳熊光曰據稱叅將毛秉剛
總兵吉林泰等帶領官兵分投搜捕殘匪俱有斬
獲而毛秉剛一路軍功梁奇在房縣牌口地方擒
獲賊匪李文魁據供係從前戕害惠倫正賊等語
該犯係積年戰手曾經戕害大員罪大惡極早應
立正刑誅而事閱多年此時若非該犯自行供認
諒亦難於查核可見此等匪犯天理難容斷不任

其漏網亦由効命疆場忠魂毅魄默爲震懾俾其
自行供吐吳熊光一面提到該犯審訊明確後自
應卽予凌遲處死仍將該犯首級解送來京於惠
倫墳塋設位致祭庶足以慰泉壚現在楚境已無
成起賊匪惟麻光裕跟追之賊所剩亦止二十餘
人爲數甚少尅日卽可辦竣該督因慶溥李天林
等均在邊界防卡不便掣動仍責成李貴李東宣

麻光裕三人趕緊搜洗所見亦是吳熊光惟應嚴
飭該叅遊等迅速掃除勿稍遲緩

十一日癸酉吳熊光奏言前據叅將毛秉剛稟報

鄒勇首領梁奇擒獲逸匪李文魁頃據委員解
到臣親提查訊據供原籍應城縣在襄陽備工

拜從王龍學習邪教嘉慶元年襄陽教匪起事
該犯同王龍投入黃號樊人傑股內充當矛手

後來樊人傑同張漢潮們各股賊匪竄到鄖縣
草店地方與官兵打仗那日霧氣瀟漫不能見
遠王龍帶同該犯等數十人在兩旁山溝內埋
伏見有頭戴紅頂花翎人帶領數十馬隊衝殺
過來該犯與王龍們在兩旁溝內突出先將戴
紅頂帽的人截傷下馬並馬隊十多人一齊殺
死後來打聽纔知是惠公爺樊人傑因該犯打

仗出力就放探馬頭歷年在川陝湖北地方往來多次打仗殺人不計其數上年五月內樊人傑被官兵打敗溺水身死王龍被殺該犯帶領十多人逃往大寧房縣老林總在山內掠食今被官兵擒獲等語當卽設立惠倫靈位將李文魁凌遲處死并剖心致祭以彰

國法而快人心所有擒獲李文魁之鄉勇首領梁

奇賞銀壹百兩以示鼓勵並據房縣團練委員
王斌第稟稱叅將李貴等所追之二十餘賊於
七月十七日竄至大羅溪地方該縣率同寨首
莊作訓等帶勇截捕鎗斃賊匪一名戮傷賊斃
二名陣亡鄉勇劉仁一名正在相持間適叅將
李貴帶兵趕到賊匪鑽林越等而逃官兵入林
搜剿殺斃賊匪五名現經分兵搜捕又據枝江

縣知縣程永洌稟稱有賊匪二人竄至西北寨
地方經寨勇張暉率勇追捕於附近老林搜獲
賊匪二名就近解交慶成審明辦理又據歸州
知州甘立朝稟稱團練委員裴大文在傅家坡
老林內搜捕鎗斃賊匪二名並據總兵吉林泰
竹谿縣徐如灝竹山縣范繼昌各稟報搜獲零
匪等四名或令解送慶成審辦或臣就近提訊

辦理並將擒獲賊匪之各兵勇一體獎賞以昭
激勸

同日吳熊光全保奏言竊臣等前准部咨議覆

經畧額勒登保等條奏承辦軍務出力人員一

摺令各督撫詳細查明分別辦理臣等前因楚

省尚有餘匪奔竄未敢遽行保奏茲各境零匪

已就肅清邊界日臻寧謐所有節年承辦軍務

出力人員應卽查明分別辦理俾使一律均沾

懜澤

臣

等伏查楚省軍興八載所有調辦軍務各員

或隨營辦理糧務專司支發或團練寨勇堵剿

賊匪並有隨營催趲兵餉軍火承辦一切文冊

檔案者各該員俱盡心竭力始終其事著有勞

績除已疊膺陞擢各員不敢再請鼓勵外其餘

在事奮勉人員

臣

等擇其出力尤著者謹繕具

清單恭呈

御覽可否鼓勵之處出自

皇上天恩其出力稍次應予議敘人員容_臣等查明

另行咨部辦理再王樹勳陶琛二員前因丁憂

飭令開缺後經_臣等

奏准暫留俟善後事宜全竣再行回籍守制在案

查該二員在楚有年於地方情形最爲熟悉此

時軍務雖已完竣而善後諸務以及清釐報銷稽察逆產在在均關緊要所有王樹勳陶琛二員可否給假回籍補穿孝服俟百日後仍來湖北差遣俟服闋後王樹勳再以同知應陞之缺補用陶琛以知縣應陞之同知直隸州補用出自

皇上天恩奏入

上命軍機大臣傳諭吳熊光曰此次李貴等所追之賊經陸續搜捕殲獲十餘名現在所剩不及二十人吳熊光務當知會慶成嚴催鎮將趕緊排搜以期早就廓清勿留餘孽此後擒獲賊匪其實係臨陣抗拒之賊目賊夥自應卽行正法至各州縣營卡寨堡擊獲之賊均須解送該督或解交慶成提訊明確按律辦理方不致開仇殺冒功之漸

同日

上諭內閣曰剿辦教匪以來所有歷年隨營辦理軍火糧餉團練寨勇出力各員俱著有勞績節經該督撫等查明保奏業已疊次加恩分別陞擢目下搜捕三省餘匪續奏蕩平各地方悉臻寧謐據吳熊光全保等續將軍營出力地方官及武職各員開單具奏施南府同知張許等八員著加恩以應

陞之缺陞用試用州同王景邕等六員著以本班
應補之缺先儘補用候補吏目裘大文等二員著
免其坐補原缺照例補用貢生徐成章著賞給八
品職銜內有同知王樹勳知縣陶琛二人係丁憂
開缺前經奏留之員著准其給假回籍補行穿孝
俟服闋後再行陞用又叅將德興遊擊金洪湖所
有任內降級處分著准其先行開復以於撤兵回營

後送部引見

十三日

乙亥

陝西巡撫調任廣東巡撫祖之望奏

言竊

臣

督催總兵楊芳趕緊剿辦太白山零匪

茲據楊芳劄報該匪等竄至平圖河經都司黨
聯陞趕到斃賊二名外委左成祥手刃賊匪一

名該匪佔據山梁恃險抗拒楊芳督同都司朱
承受馳往截擊又斃賊六名生擒一名正法該

匪竄向羅布版老林屯劉復連夜帶兵於四鼓時繞出賊後遙見號火數處卽趕緊進兵詎知攢火之處並無賊蹤賊匪皆於兩旁老林潛伏瞥見官兵臨近突出抗拒攪殺多時戮斃執旗賊目李崇一名並餘賊十餘名生擒活賊三名訊無要供均卽正法餘匪竄林逃遁因昏夜格鬪千總楊模胡文秀把總毛貴外委胡元剛均

帶矛傷石傷並陣亡外委左成祥趙得祿軍功
張得勝三員現仍帶兵緊躡剿辦該匪等多係
積年戰手並有游棍湊合狡骨異常楊芳身先
士卒徒步穿林入營晝夜窮追實屬不遺餘力
無奈賊情詭譎尚未悉數殲除今聞楊遇春入
山督剿行抵西鄉臣已飛咨囑其趕緊剿辦聞
經畧額勒登保現在暫回西鄉布置防邊事宜

所有各路尚須支應糧餉臣隨時運供不敢缺

誤奏入

上命軍機大臣傳諭陝西巡撫方維甸曰據祖之望奏陝省山內餘匪本不過五六十人今又經楊芳等搜剿斬獲二十餘人所剩更屬無幾提督楊遇春現已行抵西鄉祖之望業經飛咨催令趕緊行走楊遇春威名素著伊一經到彼更無難迅速掃

除著方維甸上蔡咨催該提督等將山內零匪全
數辦淨勿留餘孽所有楊遇春等搜捕情形卽著
谷報方維甸由驛馳奏其殺賊陣亡之外委左成
祥趙得祿軍功張得勝均著咨部賜卹

上又命軍機大臣傳諭吳熊光曰本日召見德楞泰
詢及從前殲斃齊王氏姚之富情形據稱齊王氏
等由陝西向東奔竄明亮德楞泰帶兵追剿賊匪

由上洋堡竄至張家灣溝內彼時賊匪如從溝口
竄出大路卽毫無攔阻因別無路徑可以繞至賊
前正在焦急忽見賊衆轉回又有數千人緊跟其
後疑係另股賊匪及詳加察看並令官兵示以軍
中暗號始知係屬鄖西鄉勇迎頭將溝口截住賊
匪因前有鄉勇迎截思欲搶上山梁經阿哈保帶
兵下歷明亮德楞泰督率弁兵四面圍剿齊王氏

姚之富等無路奔逃遂跳崖跌斃其時因急欲奏
報未及詳查僅將帶領鄉勇出力之外委保奏當
蒙恩越級陞用守備後來方知此項鄉勇實係鄖
西縣知縣孔繼榘平日自行捐貲雇募練習有方
彼時全資其力德楞泰因當時未經保奏後來事
隔多時亦不敢專摺具請但際此大功告成凡軍
營出力人員無不仰邀恩獎而孔繼榘從前著有

勞績實不敢掩沒其功等語孔繼楫平日官聲本
好朕所素知現又據德楞泰保奏伊前此殲斃齊
王氏姚之富等實屬該縣所募鄉勇認真出力自
應查明酌加優獎著傳諭吳熊光詳查該縣令從
前所帶鄉勇是否自行出費雇募孔繼楫現在有
何加銜是否賞戴翎枝據實具奏候朕加恩

十六日

戊寅

額勒登保奏言

臣

因川省搜捕撤兵

事宜已經與勒保逐細商定可以次第辦理隨
卽移師回抵陝邊定遠之漁渡塢一面督飭歸
集兵勇分別凱撤一面差探南山情形據報山
內零匪又經楊芳搜緝得有斬擒所餘祇五六
十人楊芳現帶官兵二千餘名入林搜捕等情
臣查山內零匪爲數無多諒卽日可以搜淨似
不值再令大兵深入楊遇春已報行抵漢中該

處正值遣撤回籍鄉勇陸續過境正可藉資彈

壓臣隨知照楊遇春暫駐漢中照料仍派令原

在南山協剿之副將吳廷剛酌帶官兵入山協

同楊芳搜緝倘日內已經楊芳吳廷剛將餘孽

辦完楊遇春卽當仍回漢南督飭東面一帶邊

防官員巡緝會哨日來各路應行撤留兵丁均

已陸續調集臣分別查核撤出山東省官兵四

百三十餘員名派令遊擊洪德張鍾琪管帶由
大坪起程取道興安凱撤又減撤涼州鎮屬官
兵六百餘員各肅州鎮屬官兵二百六十餘員
名寧夏鎮屬官兵五百七十餘員各甘州官兵
二百八十餘員各延綏鎮屬官兵二百員各河
州鎮屬官兵一百二十餘員各並西安收集各
處寄留調養兵丁一百四十名均酌派將備帶

領分起陸續凱撤回營並分咨督撫查照奏定章程應付統計與前次奏明交賽冲阿帶回西寧寧夏官兵一千名共減撤陝甘官兵三千餘名外省官兵四百餘名其廣東直隸各省官兵現在派兵前往更替亦卽陸續起程至陝省征防鄉勇尚存六千餘名自六七月以來各路均又隨時撤遣茲_臣復於隨征鄉勇中逐加查點

將平日搜剿出力誠實純良者分別挑出暫留
協防外有情願入伍食糧者四百餘名當卽分
給各營以次補額願回原籍者一千二百餘名
均面加慰勞照格賞給各將器械收繳分起送
赴漢中交陝安道朱勳照例資送將包封銀兩
交各原籍發領以資安業計八月分陝省實存
鄉勇三千四百餘名並據各路稟報叅將陳弼

搜獲賊匪二名達斯呼爾岱羅聲臯在川東山
內搜捕殺賊一名認係探馬頭袁登俸又投出
秦四鈴子等三名總兵田朝貴在大寧山內獲
賊二名副將馬應國在大寧平南漕獲賊四名
殺賊一名副將馬元等在新開界內獲賊四名
殺賊三名總兵蒲尚佐獲賊二名殺賊一名守
備馬安良在大坪獲賊一名

臣均于審明後分

別辦理查核各路鎮將稟報山內實無數十名
成起之賊其前在川境派出搜山之將領等現
均分路搜緝回營均稱並無賊匪臣不敢因各

路報稱無賊稍有鬆勁仍隨時督飭認真搜緝
其川東邊界據豐紳蒲尚佐報稱分兵在所管
地方搜緝與楚境官兵會哨並無賊匪楚省總
兵慶溥李天林報稱分兵在所管段內搜緝與

川省官兵兩相見面會哨實無賊匪惟總兵吉
林泰一路報稱都司張代鳳搜至牛口地方獲
賊五名又接吳熊光來信都司麻光裕等在房
縣焦碑坳斬獲賊匪數名所剩零匪二三十人
均分散逃入山內現在數路兵勇嚴搜卽日可
以淨盡此外亦無別起賊匪等情臣於數日內
將西鄉一帶防卡分佈完妥卽移師東發向安

紫邊界查閱各營卡兵勇分別遣留辦理再此
次調用各省武職官員爲數較多其超衆出力
者均隨時奏明鼓勵尚有隨同帶兵亦著微勞
或派令分段防堵委辦冊務人數太多不能遍
及有數年來尚未得一邀獎敘者共計有一百
一十四員謹分別等第造冊咨部均應仰懇
天恩加以獎敘奏入

上命軍機大臣傳諭額勒登保曰額勒登保奏回抵
陝疆酌撤兵勇並搜捕各路情形此時川境雖無
成起之賊猶有三五爲羣乘間逃竄額勒登保當
知照勒保督飭鎮將遍爲搜淨湖北零匪無多亦
卽知照吳熊光上緊搜捕淨盡至陝境南山內餘
匪剩有五六十人楊芳所帶官兵二千餘名雖已
數十倍於賊足資搜剿毋庸再添兵力但刻下尚

未辦淨恐楊芳一人未足深恃遇春已行抵漢
中仍應飭令前往幫同剿辦現任額勒登保近在
漢南更可隨時調度以期迅速歲事倘稍有遷延
德楞泰卽日自京回川彼時額勒登保自應入都
展覲非如德楞泰係成都將一軍仍須回任者可比
設因南山零匪未淨致有稽留成何事體耶額勒
登保務卽飭令楊遇春等趕緊搜剿尅期完竣所

有楊遇春等搜捕情形前已有旨諭令容報方維
甸具奏此時額勒登保已抵陝境卽著容報經畧
隨時奏報至另片奏懇將歷年隨同帶兵之各省
將弁一百一十四員分別等第交部議敘一節卽
著額勒登保將該將弁等功績註明咨部核辦

十九日辛巳勒保奏言臣所帶吉林索倫馬隊官

兵節次裁撤此時尚存八十四員名刻下川省

餘匪掃蕩肅清應先令凱旋內除黑龍江驍騎
校台清阿等四員暫留川省造辦報銷兵冊外
其餘八十員名歸於一起卽交原帶之達斯呼
爾岱花品塔什拉等管領取道陝西凱撤回營
所有沿途經過陝西山西直隸各地方卽知照
該督撫分飭州縣查照軍需凱旋之例應付前
進又有德楞泰一路吉林索倫馬隊官兵四十

員名或因患病寄留夔州或因差委在各路查
收病兵德楞泰現已進京臣卽代爲歸集仍交

原帶之副都統銜總管富登阿管領另爲一起
因該官兵等患病居多且俱寄留夔府是以飭
令就近由川東坐船取道湖北行走並知照湖
北河南直隸等省一體應付俾利遄行所有該
兩起官兵均約計九月十月可以先後過京再

四川現存綠營外省官兵只有雲南府官兵二千餘名貴州省官兵二千餘名此時撤兵自應先滇後黔臣現將川省所存雲南官兵全數歸

集分作四起每起以五百人爲率第一起派交遊擊陳龍驤守備閻寬夏伏管帶第二起派交叅將席正林都司高發榮守備王正剛管帶第三起派交遊擊門繼春守備白聯陞陳偉管帶

第四起派交叅將傅廷佐遊擊晉之連守備連瑄管帶均於本月內分日起程回滇所有應付各官兵分例卽查照上年奏定章程應付其貴州官兵現在各路搜山俟歸集後再行陸續凱撤其各路隨征鄉勇亦現在歸集查明情願入伍歸農以次分別辦理再達斯呼爾岱連年隨臣帶兵剿賊打仗勇往馭兵嚴肅該員係屬大

員已蒙

恩賞加副都統銜

臣

不敢冒昧保奏至其所帶兵丁

晝夜奔馳不辭艱險著有勞績者甚多除節次

奏蒙

聖恩鼓勵外茲據達斯呼爾岱面稱有黑龍江領催
德清額那提木福馬甲德勒登額鄂倫札普章
傑保吉林馬甲明元等六名本年在老林搜賊

均能分外出力茲當凱撤回營可否仰懇

賞給額外驍騎校以示鼓勵至連日官兵分路搜緝
情形據豐紳一路在大寧老山搜獲零匪九名
總兵田朝貴一路在黃柏巖天臺山等處老林
搜獲零賊二名總兵馬瑜一路在寒水壩等處
老林搜獲零賊六名總兵蒲尚佐一路在高脚
池搜獲賊匪一名副將桂涵一路在蒲包山搜

獲賊匪一名參將陳弼一路在鳳廂堽蓮花庵
等處搜獲零賊十名副將馬元一路在觀音橋
鳳台寺等處搜獲零匪五名又副將羅聲臯一
路在王家坪搜獲零賊二名臬司劉清一路在
通江老林搜獲斬逆之姪斬明林一名又投出
二名又據東鄉團練委員楊世鯨稟稱有零賊
岳湧康李會生余爾俸等三名赴案投首

臣將

具報各犯提營訊明分別辦理仍飭各路鎮將
照舊分投排搜以期不留一孽此時零星緝捕

臣毋需親赴前敵而應撤官兵均調集綏定查

照分別遣撤應撤鄉勇亦調集綏定分別入伍

歸農皆須親自經理是以臣於初三日已回赴

綏定擬駐劄一兩月次第辦理仍派誠實可信
之弁員分赴各路稽查守催以防鎮將等偷安

鬆勁奏入

上命軍機大臣傳諭勒保曰此次官兵分路搜緝零
匪又斬獲四十餘人勒保因川東川北賊蹤漸次
肅清無須親赴前敵卽於初三日回駐綏定經理
撤兵撤勇各事宜自應如此辦理該督當勉籌善
後務以安民爲本其餘皆屬可緩此時川境俱不
過一二零星散竄之賊本無所謂前敵自無庸勒

保親自前往但恐所派分路搜捕之各將領因餘
匪無幾轉生懈弛或藉詞風雨天寒有意延宕虛
糜餉項尚屬末節若令遺灰稍燃成何事體該督
務當嚴催各鎮將上緊排搜勿留遺孽其實在出
力者仍當隨時保奏倘有偷安鬆勁搜捕不力者
卽當據實叅辦務令賞罰嚴明人知激勸以期剋

日淨盡

同日

上諭內閣曰勒保奏軍營接捕零匪出力之黑龍江
領催德清額那提木福馬甲德勒登額鄂倫札普
章傑保吉林馬甲明元等均著加恩賞給額外驍
騎校以示鼓勵

二十五日丁亥吳熊光奏言據總兵吉林泰稟報

連日在歸巴一帶邊界搜捕並無賊蹤惟聞川

省巫山縣屬之下馬坪地方有零匪潛匿正在
往捕問適叅將李貴等所追之賊竄至平陽壩
邊界卽向下馬坪奔突有與該處零匪會合之
勢經前次派來南路堵截之叅將毛秉剛帶兵
迎截餘匪望見官兵卽折回鑽入老林四散分
逃現在卽令毛秉剛跟蹤搜捕其巫山下馬坪
之賊另派守備朱貴帶兵往搜並據叅將李貴

稟稱該將所追之賊經毛秉剛截回後繞由興山長房河一帶深林潛逃李貴等分兵數路各棄鍋帳馬匹攀藤附葛跟蹤窮搜尋至石滾巖劉家碛該匪哭出奔逃經官兵鎗斃賊匪二名餘匪由山後爬巖飛逃旋被都司鄧興相搜獲一名都司倭恒額搜獲賊匪一名餘由溫水河一帶逃往房屬硃砂河老林仍趕緊追捕又據

竹谿縣徐如瀨稟稱有川匪八名竄至川楚交界之椒峒子被防邊兵勇鎗斃一名餘匪七名折回川境老木孔地方經川省官兵接追前進並據總兵李天林慶溥等各稟報排日在川楚邊界往來會哨並無餘匪伏匿奏入

上命軍機大臣傳諭吳熊光曰楚省零匪節經官兵搜剿所剩本屬無幾此次李貴鄧興相等分兵數

路到處窮搜亦有斬獲更不難剋日辦淨吳熊光
務應嚴飭各路鎮將趁秋末冬初未到冰雪凝凍
之候卽行上緊排搜淨盡不使一名漏網再將該
省征防兵勇察看邊防情形以次裁撤

二十六日

戊子

額勒登保奏言據楊遇春呈報查

得山內零匪四散分匿當卽帶兵由洋縣取道
華陽四畝地入山親督搜緝以冀早靖餘氛

臣

於

欽頒賞項內撥發銀八百兩交楊遇春如官兵寨民
內有能奮勇擒殺積年真正賊匪者卽按名照
格賞資其隨營並因病落後未經資送裁撤之
勇如有口食無資者卽酌給盤費回籍倘有不
安本分者卽盡法懲治現經陝安道朱勲稟報
各處鄉勇送到漢中者四五百名均遣送回籍

至山內卽有數十零匪一經官兵剿散各地方
官督飭寨堡團勇隨處幫同查拏更可得力陝
省從前行之已有成效第恐地方文武因大功
已蕪或有懈弛臣飛札各營汛實力查辦現又
咨明撫臣祖之望一體嚴飭地方官設法搜緝
無論零匪棍徒概行查拏審辦如係無業游民
本地方官卽妥爲安置不令失所不惟於現在

搜緝得力卽將來亦可永靖地方

臣

因邊界無

人督率移紮鹿池壩辦理撤留兵勇連日又撤

出廣東官兵一千五百餘員各直隸官兵一千

五百餘員各挑出老弱固原官兵四百餘員各

共計續撤官兵三千四百餘員各均分咨沿途

照例應付又據前次派在川境搜山之叅將李

朝顯都司張起鰲余步雲劉勝祥等四路兵勇

稟稱連日由大寧太平之後坪寒溪河高坪七里坪明通井雞鳴寺大庠口十里坪白枝山花岳山一帶山林分路搜緝並無賊匪又據總兵馬瑜蒲尚佐稟報巫山邊界與楚省防兵會哨並無賊蹤又據慶溥吉林奉李天林稟稱與川省防哨官兵彼此會哨實無賊匪川陝楚邊界均已一律寧謐惟七月下旬以後陰雨連綿山

溪時漲時消道路多有衝刷陝西候補未入流
馬承憲奉派催饋糧運不辭勞瘁於初七日在
陳家灘地方騎馬親率夫役躡淺淌渡河水漲
發淹斃夫役二名該員亦被漂沒身死可否照
例給予卹典之處出自

聖主天恩奏入

上命軍機大臣傳諭額勒登保曰陝省南山內搜剝

零匪現在爲數有限楊遇春業已帶領原兵於洋
縣取道入山督同楊芳吳廷剛等攜帶賞項分投
趕辦自可早淨餘氛額勒登保務須上緊督催於
一二旬內辦竣俟德楞素於出月展覲回川後額
勒登保即可起程來京若彼時山內殘匪稍有未
盡額勒登保又須在彼逗遛成何事體至摺內稱
據總兵馬瑜等稟巫山邊界與楚省防兵會哨並

無賊蹤又據慶溥等稟稱與川省官兵會哨亦無賊匪等語此則未可盡信從前賊匪滋擾各鎮將帶兵打仗時尚每以雨水過多道路泥濘爲詞艱於前進今大功已蕪所剩者不過一二零匪猶須搜捕各鎮將等更未免心存懈怠卽於邊界會哨亦或畧爲巡邏輒以無賊稟報額勒登保仍當飭令川楚防守各員認真排搜勿得以零匪無多稍

爲鬆勁所有承辦糧員未入流馬承憲因河水陡漲猝被淹沒著加恩照軍營病故例咨部賜卹